

四庫全書

集部

欽定四庫全書

集部

石倉歷代詩選卷三百八十二至
四

詳校官編修_臣謝振定

侍讀臣孫球覆勘

總校官進士_臣朱 鈐

校對官檢討_臣季學錦

謄錄監生_臣朱 堦

欽定四庫全書

石倉歷代詩選卷三百八十二

明 曹學佺 編

明詩次集十六

張和

登泰山

昔聞泰山高今上拱北臺剛飈振六合曠望無塵埃日
觀一峯立天門兩崖開瀑流注空谷響轉萬壑雷似聆

笙鶴音縹緲雲中來羽節分上下長煙共徘徊
車杳難接自愧非仙才

送劉文羽赴京

臨歧一杯酒為君歌遠遊人生若流萍聚散
焉能謀落日照大江長風吹去舟江花與江水
離恨同悠悠

期友人金河橋上納涼不遇

涼月鑑廣津微風集高樹翻翻棲鳥驚杳杳
流螢度蕭條旅邸懷悵望橋東路何事致愆
期無言獨歸去

夜宴曲

銅盤絳蠟流晴虹
蜀絲步障圍香風
瑤釵寶髻光玲瓏
紅身按控白紵舞
仙袂翩翩欲輕舉
驚鴻翻雲雛鳳語
水晶簾箔搖寒星
金鴨腦麝流芳馨
蘭芽玉茁春娉婷
鈿簧悠悠歌宛宛
鯨吸流霞恨杯淺
曲闌露寒斜月轉
儀真別越客

落日照芳草長風吹斷雲
滄洲送歸客遠道惜離羣
樽酒何年共江帆此路分
蓬開獨回首鳴雁不堪聞

題江湖勝覽卷贈李彥暉

萬里一孤舟常年事勝遊
星河三峽夜煙樹五湖秋
跡擬玄真子名齊博望侯
翻憐蓬輩士白首卧林丘

蘭陵秋夕

碧樹鳴秋葉芳塘歛夕波
漏長稀箭刻樓迥逼星河
候雁迎霜早啼蜚傍月多
懷人不能寐彈鋏起商歌

過桐君山

雲斷山疑合川迴路忽分
秋聲兩岸葉曉色萬峯雲
旅

雁衝帆度寒蟬隔水聞嚴陵遺跡在我欲問桐君

送行人劉諭使滿剌加

華髮漸盈頭誰憐萬里遊佩辭天闕曉帆挂海門秋積
水浮仙嶼寒星伴使舟歸來宣博望準擬是封侯

度嶺

疊陂盤盤上溪流曲曲通馬嘶青嶂外人度碧霄中積
石奔狂獸飛梁卧斷虹驅馳奉明詔焉敢惜微躬

雙溪晚行

落日雙溪暝南風一舸輕水螢飛不定沙鳥宿還驚捲
慢灘聲遠披襟露氣清千峯互迴合何處望神京

遊方山

目覩山中勝神遊物外天一塵飛不到千嶂迥相連磴
道盤危壁禪宮近瀑泉馬嘶紅樹裏人度白雲邊洞穴
龍吟水香臺鶴舞煙竹深纔辨路松偃不知年閭苑颺
難馭滄溟石可鞭經過暫成趣何必問神仙

泰山絕頂作

俯視羣山小方知岱嶽尊峯高礙星斗勢遠壓乾坤疊
嶂紛開闔浮嵐互吐吞彤霞橫御帳碧落近天門絕壁
唐銘在穹碑漢刻昏石屏當道擁雷瀑下雲翻裡祀時
方啓明堂跡尚存登封七十二我欲問軒轅

過賈誼宅

少年流落到湘濱當世何人更惜君身類楚囚非達者
書陳漢室但遺文空林落葉分秋靄廢井寒蕪映夕曛
欲弔忠魂無覓處嶺猿回首不堪聞

賦得柳送人

暖風披拂暫歲艸色映鶯黃
淡落暉煬帝宮前春漠漠
闔閭城外晚依依青驄每綰長條繫
紫燕遙衝落絮飛
有客河橋待分袂一枝遙贈惜相違

與朱千戶夜話

客裏相逢感慨深
劒歌時復動悲吟
清樽坐對三更月
紫塞遙馳萬里心
瀚海地荒龍駕遠
交河風急雁書沈
微臣愧乏安邊策
北望冰天淚滿襟

南山清隱為宣城湛銓作

遁跡甘從鹿豕羣
南山深處隔囂氛
屋前流水連青嶂
階下寒松護白雲
栗里自留元亮酒
草堂寧辱穉圭文
紛紛車馬塵中客
高節能無愧隱君

早朝

白玉欄干近綺疏
絳羅宮燭映金鋪
仙韶未作班初定
試聽雞人第一呼

沈彬

字原質吳興武康人正統壬戌進士刑部山西司郎中公作文典雅清淳未嘗輕自表著

病免閉門卻掃優游自如口不談世事所撰
有蘭軒集是時聞人張寧夏時正俱為之序

浩歌行送建寧陳泰之官胥江

十年前飲貪泉水隱之肝膽心相似今日送君十年後
挾出肝膽猶如舊丈夫何必盡公卿男兒須留身後名
珠海潮生月正出石門風靜雨初晴浩歌放浪中流飲
踈星倒影銀河橫故人若問今能不簿書除却眼前清
聖節擬進賀詩

一氣陽來復含靈已兆春帝心謹齋祓天命用休申萬

壽無疆祝千秋寶鑑陳壽慈時有樂歡忭洽天人

王谿漁隱

憶昔扁舟訪王谿滿隄花樹逐人迷
開籠放鶴雨新霽倚棹觀魚日未西
野老醉歌青箬笠牧兒歸唱白銅鞮
鹿門誰道遠朝市風月一灣猶可攜

送聶太守好謙之任廣州

五馬新騎出禁城飛花紅映繡鞍明
九天德澤分推拓千里耄倪仰治平
珠海藹雲潮未涸石門澄霽瘴初晴

隱之去後多庶吏拭目看君再一行

送人分得泗渚白蘋

歌風臺下晚維舟
白浦蘋花兩岸秋
浩月橫江來獨鶴
清煙連渚散羣鷗
輕盈塵起凌波襪
磊落珠聯玉臂篝
眼底可人便吟咏
不須重上仲宣樓

丹陽北新豐道傍
兩石人傳聞昔有二人夜行
遇明遂止于此是固無稽之談
然貌偃僂醜陋不類乎墓道
所列者謾賦一首

道旁竚立兩班班秋不成衣冬不寒風雨凋零容貌古
冰霜搖落蘚痕乾舉頭何物楊歧泣極目誰憐蜀道難
未說桑田變滄海歲同明月照人寰

寄贈芮梅菴處士

十畝閒閒老此生清泉白石伴幽情每邀明月持杯管
不逐春雲遶市城池館醉歸花正發山堂夢斷雨初晴
何時獻罷釣天樂林下期君把臂行

水竹幽居

兩楹虛敞瞰清流
遶屋脩篁面面幽
春草細分三逕曲
夕陽斜映萬竿稠
筵開雲影侵杯勺
舞罷空冷雜佩鈎
遲老借君風月裏
短衣醒醉伴沙鷗

元夜讌集

禁城三五弛金吾
聖主恩深錫大酺
燈月照中齊引白
笙歌聲裏重投壺
朋懷不盡中宵美
帝澤旁流曠世無
醉飽敢忘葑菲采
願傾愚悃進訏謨

漁隱絕句

短衣烏帽老滄浪
留客開樽食有魴
歎乃一聲山月白
不知身世在羲皇

盛用章進士歸省松江兼東廷琛汝濂應辰諸

君子

日下滄江萬里餘
一秋將盡又無書
憑君寄語華亭鶴
載取機雲唳碧虛

白居易精舍寺寄題和韻

東南山水冠湖州
笠澤煙波載弁丘
白傳題詩精舍寺

至今人說可堪遊

張寧

字靜之海鹽
人有方洲集

蓮池疊翠

池中荷欲花池上水初漫初看水尚微旋覺香不斷一
曲密藏鷗萬柄嬌依岸莫唱采蓮歌江南時節換

菊徑凝香

田園去來久三逕行復期采采黃金花照我頭上絲含
英抱幽馥佳會良在茲羊腸九折坂蔓草應正滋

對雨

草木已時萎時菊方數榮林空晚色淨日暮孤煙橫仰
蔭脩竹枝俯挹蒙泉清歲月忽復易採擷傷吾情

愛蘭

稟性無俗尚愛此山澤芳拔葵莢周圍分植置中堂入
室有佳士紉佩非私裳時好豈足貴德馨諒難忘

送別沈履德

園花發朝艷谷鳥遺春音豈無旦夕佳倏忽流光陰幽

居寡時好感子時過臨冥言息孤憤高步超煩襟夙昔
懷遠道遙別悲來今對酒不及醉眷此故情深

劉公覲畢姻詩勉之

飛飛鴛鴦鳥比翼湖之涯生年不滿百燕婉當及時東
隣有處女春秋盛容姿一朝辭父母托身游俠兒豈無
百兩將而乃蕩子妻妍華不自好終身抱餘悲況君良
家子衣冠能自持母窮畢日歡負此遠大期

答姜文進

瀾瀾江中水黯黯江上樹眷彼同心人胡為忽異處駕
言從扁舟積雨不可渡願隨雙黃鵠庶以相會語

林居秋興

商飈起天末新涼入丘墟晏坐當前楹陶然讀吾書俯
視庭草萎仰看浮雲舒山氣日夕佳灌木陰以敷軒冕
豈不貴為樂自有餘願子保令終因之相與娛

菰蘭為王本誠作

猗猗谷中蘭言菰君子堂過門不入室彼美自芬芳彈

冠結素履振策循周行我心愁如飢覲止諒已降容顏
挹清潤言笑聞馨香同心未半語欲去仍彷徨眷戀終
日夕賓主已相忘

玩芳亭

東風吹野花秋雨敗薜草彼美亭中芳靜植恒自好階
蘭閒更香籬菊淡如掃我欲掇其英幽懷不堪道

蒲萄

叩竹與枸醬追逐秋風來離宮鬱相望異物紛栽培遂

令涼州牧斗酒遺詎諧傷哉出關卒不及枯株回

二

神龍驕正眠驪珠爛將墮清露溥花間涼風生葉下悠
悠日觀翁蕭蕭友雲者我欲掇其英陽春和應寡

水南別業

幽居異前業喜無塵俗喧東風扇微和忽此春事繁遊
魚汎深沼好鳥鳴簷端布穀正及時呼童理荒園羣動
各有為予生顧夕盤感之欲自見對景已忘言

為邵同府題山水圖

秋風吹亂雲涼露潤脩竹林深風葉靜石爛雨苔複青
山斷平野流水瀉虛谷茺彼山中幽悵此暮行獨希聲
振清嘯灝氣凝遠目澄光發精爽空翠襲巾服時看夕
鳥舉偶晤春莽宿功名忽如遺志念聊可復俯視塵中
人擾擾隨轉轂

馬和之野有蔓草圖

蔓草長滿野良辰胡不來民窮井邑異豈獨荒閒思佳

人歲年暮會晤恒苦遲天天桃正花燕婉當何時

送張永清下第南歸

長安花落鶯聲老送別都門心草草白壁由來惜暗投
俗眼相看不知好讀書十載未成名落日辭家仗劍行
飛騰未遂丈夫志離別無為兒女情黃金高臺挿天起臺
下行人思郭隗千里元從駿骨來躁進紛紛徒已爾負
郭田荒草蔓滋婦不停機嫂不炊一朝唇頰驚六國腰
間金印何累累縱橫游說非吾有汗簡功名在人手干

將未出獄中泥猶有神光射牛斗出門有礙情悽惻不
是長安看花日進退枯榮事偶然欣戚何須動顏色冠
蓋相逢自有期君歸應惜少年時浮雲流水天涯路回
首令人千萬思

寶劍篇

干將在匣神鬼驚土花繡澀含蒼精千年地下靈不死
萬丈燭天牛斗橫壯夫入佩心相許唾手功名輕一縷
倚天長嘯氣食牛誓斬樓蘭決胡虜歸來獻馘朝宸旒

奮言先落佞臣頭
河清海晏頌聲作
乞身復向西山陬
我歌寶劒聲如吼
颯颯英風生兩肘
丈夫作事貴軒昂
肯向蓬門甘老醜

伍子胥渡江圖

壯氣橫空欲吞楚
半夜函關出虓虎
城中追騎若行雲
泉下孤臣淚如雨
江頭立馬寒飈颭
江神吐泣皇天愁
捐軀甘作異鄉鬼
誓死肯忘同天讐
何來父老傷羈阻
艤棹招搖夜相渡
百金寶劒辭不收
萬石功名草頭露

雄兵一旦下吳臺
楚國山河半草萊
舊主已隨烽火遁
將軍猶入故宮來
秦庭泣血昭王返
白苧歌長越兵遠
夫差夜飲欲烹龍
勾踐宵衣正嘗膽
零落鷓鴣夷百戰
身姑蘇麋鹿謾傷神
君看楚郢鞭屍客
應是吳門抉目人
送仲指揮南還

去年送君春已過
花落鶯啼薊門路
今年仍作遠遊人
風雪還家歲行暮
灤河半夜渡層冰
千里淮陽十日程
揚子江頭沽酒宿
薊門樹裏聽雞行
到家應近元宵節

細柳營邊新草發，刁斗無聲清夜長。
旌旗亂影蠻煙絕，去年攜酒送君時。
有約封侯來更遲，今年復送長安客。
却憶從前送別詩。

歐時熙家山圖

我聞廬陵風景天下無，孤城斗絕凌荆吳。
東南兩山互昏曉，日月重岡森蔽虧。
龍洲却過太和縣，武峯卓立香城居。
地靈宜有傑人出，舉目便覺江河殊。
六一仙翁呼不起，高節清風照桑梓。
鄉里于今說故家，詩書有澤遺。

孫子芬芳玉樹被中庭辟易名駒在千里黃甲題名氣
吐虹太微執法心如水遠別庭闈今幾年孤雲望斷舊
山川青陽宛宛白日暮一顧魂魄俱茫然餘情散入大
江水歸夢正落幽林前林中老人年七十面渥童顏髮
凝漆華屋山中宰相家錦衣天上神仙客生兒早入鵷
鷺行投老不忘山水窟百歲優游自可期故園風物正
芳時悠悠忠孝丈夫事榮枯利達真兒嬉太行山上瞻
雲客應有房陵西去思

士女圖為張宗大題二首

吳城士女越樣粧
籠冠盤髻銷金裳
東風淡蕩桃李月
看花不語情何長
女伴相將牽穉子
庭院無人花正芳
陽春宛宛白日暮
空抱花枝歸洞房

二

芙蓉迎秋木犀早
開到黃花秋欲老
涉江人遠雁來遲
零落東籬為誰好
小娃扶幼步車輕
聞語回頭心懊惱
曲房深閉綠苔生
何處寒衣月中搗

渥洼馬歌

何物偃強暴厲長權奇倣儻生歌章蒲梢西極沓相舉
天閑十二皆龍驤羌胡喜蹴躡騁步貳師成功宛初破
邊塞年年戰骨新錦轡雕鞍只如故

瀑布圖

綠陰庭宇生南風醉倚曲欄幽思濃平生不到水簾洞
一坐便憶香爐峯怪來詩思清人骨水草林花助蕭颯
煙霞滿地暮忘歸長嘯一聲山月白

魏仲禮金筆院景四首

瓊芳玉爛春如畫
金屋娉婷晚粧罷
紫垣星象照千門
天上人間共清夜
金蓮炬促雙步搖
銅龍咽盡蠅聲囂
衾綯未煖聞魚鑰
起候宮車視早朝

二

果臝玉綰珠垂絡
水殿玲瓏澄碧落
綵扇翻香蛺蝶輕
綃衣簇翅蜻蜒薄
釣天畫永無纖埃
水晶簾動南薰來
三千粉黛放將盡
十二樓臺閒自開

三

畫屏銀燭秋光淡，寶篆金爐香夜旦。
昭陽前殿月華沉，長信宮中漏聲斷。
晨辭同輦別椒房，紉扇涼多未忍藏。
梧桐露重桂風急，吹作芙蓉葉上霜。

四

氍毹襯滿貂闌密，月光斜透幔香壁。
人爐肉障曠前聞，酌酒臬羹荷殊錫。
內間時報五更籌，一點銀燈過御溝。
邊衣連夜催刀尺，明發傳呼焚雉裘。

乘槎圖

火敦腦兒天際頭河源遠絕崑崙丘漢家使者去西域
何事却向天潢遊開邊貴物當時事莫怪傍人詫靈異
真偽悠悠世轉深荆楚猶傳歲時記

一徑野花落孤舟春水生畫

林外春陰曉風作門徑幽深野花落東家春色過西家
井口籬根亂漂泊溪頭新水繞門生扁舟一葉輕如萍
杜陵老病烟波遠欲載詩愁過洞庭

題畫

天空水濶饒風露秋入溪山無盡處紅葉低垂隔浦霜
白鷗飛落無人渡蕩漾空明一釣舟煙簑雨笠下中流
心情物色知多少手展青編還自收

蒲萄圖

紫絲步障流蘇短露淡風清秋未滿舞鳳翎翻翠解苞
蟠龍骨瘦珠垂頷青蕊首宿錦石榴枝交蔓引彌山丘
驂騑不至仙槎遠空有草物遺中州君不思涼州一斗

猶輕換西行千騎歸無半

層巒秋霽為諸立夫題

秋風吹雲秋雨晴羣山滌翠羣峯明天光下際澤氣隱
一碧萬仞青螺橫山高石峻無蘼草桂館蘭房淨如掃
振谷天球練瀑飛障林霜錦丹楓繞采蘋誰泛小蘭舟
急水迴塘不自由雲端笙鶴來何晚澗底荆薪人白頭

題嚴仁遠畫

青山碧海煙霄外晴川茂林相映帶柔柔葉暗笋芽齊

葭蕪滿眼春何在湖中樓船閒自橫
湖隄歸馬無嘶聲
太平處處烽煙息不見當時細柳營

綠陰清晝堂

山中有高士結屋住巖丘樹密鳥聲亂
林深鶴夢幽雲
來疑向夕風度欲驚秋何日尋三徑
相期避暑遊

送常州王經府

三年勞贊府千里覲長安
政為傳家熟清因近俗難
煙雲江浦別風雨郡齋寒
却愛難兄弟聲華總未闌

題黃子久畫

地域分吳越河山閱古今江空寒雁下天遠戍城深
官達悲長往睽違負此心何當隨釣叟歸卧北岩陰

題畫

綠水明遙浦晴巒發曙光舟人迷蜀道估客涉沅湘
近渚江蘿熟盤雲塞雁翔懸知登眺日懷古使心傷

送張璆

客裏相逢好臨歧益惘然歸心吳苑月鄉夢楚江煙
雲

水經千里星河共一天重來應未卜塵榻為誰懸

竹鶴老人畫為徐時用題

山水藹清妍東吳三月天雨中聞社鼓樹裏見炊煙詩
景誰家屋間情野渡船無人共登汎斜日下長川

為楊廷獻題畫二首

山色青無際溪流綠漸深淡煙依遠岫疎雨過平林不
見輪蹄跡惟聞鐘磬音何當去城市來此亟招尋

山峻容過鳥溪深隱釣舟平生不到處今日偶來遊迹

遲踰青障招尋近翠樓桃花流水暮歸路使人愁

水竹圖

漠漠孤煙合盈盈一水深汗青誰涉采猗菜自行吟野
色將秋思江聲併夕陰可憐桃李月風雨斷幽尋

竹林七賢

深竹暗浮煙羣公樂事偏高情動寥廓清論入微玄豈
是巢由侶何如沮溺賢其誰匡典午勲烈照遺編

山寺晴嵐

縹緲帶春霏山深野寺微
淡隨香靄散濃映雨花飛
因鶴驚茶竈閒僧閉竹扉
明朝去遊覽擬着薜蘿衣

引泉渠

疏鑿近山陂開雲導玉脂
岸迴斜沁圃石矗細通池
溪雨漲來急野花流到遲
因之想清渭欲訪鄭當時

舟過富陽

離家纔十日鄉思漸多違
江近村居少山高石路危
野人驚客至水鳥傍船飛
何處桐廬縣蒼茫對夕暉

踈籬叢菊

邊城寒氣早九月盛黃花
謫宦悲前事荒蕪憶舊家
直須存晚節何用惜年華
醉卧東籬下悠然白日斜

雨庵為興聖澤公題

樹滋林借潤客斷屋添幽
穿榻有寒色空階無夜愁
微懷生物喜久慰望霖憂
多少離居者斜風江上舟

楊妃荒塚

幸極多生變恩深不到家
寧歸掖庭獄得祔後宮斜
鬼

火消寒雨魂香散落花猶勝莫臯婦青塚亂胡沙

竹西小隱

竹西茅屋下偏絕勝玄洲塵路橫遮斷山泉右折流卧
便朝日晏坐愛久陽留不是翛然客無人到水頭

送趙時英

孤城南望曉依微家在千山獨掩扉白髮倚門遊子遠
青雲推轂故人稀河梁歲晚冰霜合驛路天寒雨雪飛
冠蓋相逢知有日暫時分手惜多違

七夕有懷劉世亨

海城梧葉墮新秋
露坐中庭夜色幽
微月遙隨銀漢轉
清樽不共故人遊
曾聞玉殿傳燈火
更想瑤臺望斗牛
千里相思應未寢
故園南望益離憂

濟寧道中

宦情離思共依依
極目關河四顧微
千里風雲隨去馬
五更霜露滿征衣
山連齊魯居人少
地接淮揚故舊稀
自愧才華非董賈
春風何日覲彤闈

感事

羽書昨夜報居庸百萬雄師下九重天子垂衣臨大漠
羣臣端笏扈元戎禁中已乏回天諫閭外誰成闢地功
千古澶淵扶日轂令人長憶寇萊公

又

寶馬朱輪接上游時危誰解奉天憂鼎湖龍去英雄盡
劍閣雲深日月愁玉輦已隨胡地草青山依舊漢宮秋
元勲野死潼關破誤國何人更首丘

寒潭釣雪

西風吹雪滿秦川
寒擁絲綸上釣船
悵望平臨飛鳥外
詩懷多在白鷗邊
羊裘高節真堪侶
鶴氅清風欲上仙
最愛晚來堪入畫
一蓑披向酒家眠

過梅庄懷舊

野梅茅店石闌干
白首空山幾度看
紙帳梨雲春夢短
石橋溪雪暮窓寒
風光不減當年好
詩酒猶懷晚歲歡
却憶種花人不見
隴頭無信月漫漫

江山勝覽為維揚張明之題

萬里江山接故鄉十年詩酒任踈狂
黃河西去龍門遠清渭東來劒閣長
一騎寒雲登五嶺孤舟明月度三湘
何當收拾天涯興歸卧維揚舊草堂

雪中偶書

江南三白兆豐年最好湖山晚霽天
沽酒欲迷歸市店捕魚還見出濱船
雲連野色和煙暝人共梅花待月圓
不是梁園詞賦客也隨煙景一陶然

再遊寶所

負郭岩扉敞石壇上方門徑遶層巒樓觀海日夜先曙
竹引湖風夏亦寒林外歌聲樵出谷水中人影釣揚竿
何當雪月煙花候來共山僧信宿看

山水圖

水車聲急綠陰肥水漫漁罾白鳥飛斜日照林停晚牧
新蒲近渚映春衣采蓮歌唱時將及競渡風光事已非
望斷五湖舟去遠月明應有市船歸

秋日與梁克宣韓成章陳彥章遊湖

蘋香蓼色滿滄洲
翻覺湖山勝昔遊
十里清談消斗酒
兩峯寒思入孤舟
浮雲聚散誰應繼
落日盤迴重此留
歸棹莫驚遊賞客
數聲柔櫓下中流

出郊

路僻輪蹄少
溪深草樹齊
春風不解意
花落乳烏啼

盛子昭山水竹石

白日湘江晚
黃雲渭水秋
懷人不可見
煙雨滿秦樓

題夏太常畫竹

春雨住猶滴夕陽寒欲沈
相逢不相語惆悵遠遊心

倪元鎮小景

紅樹滿雲山扁舟渡煙水
載酒欲何之擬訪巢居子

雜咏

秋水際平蕪人家隔江浦
何事晚歸來扁舟載煙雨

嚴灘圖

物色既堪見相逢無所言
高風已千古微意竟誰論

張南山

冥冥天際風歷歷江心樹隔浦望漁村人家水中住

獨檜屏

雲母秋堂別金泥畫障非空山埋玉處孤翠蔽玄扉

園梅盛開

暖透孤根雪乍消冰花萬點綴寒條尋幽欲寄山中客
忘却西湖有斷橋

龜溪晚泊

桑柘陰陰碧草齊
隔溪茅屋夕陽低
村南村北無人跡
惟有山雞背水啼

懷舊

吳興佳境道場山
絕壁迴巖紫翠間
十載舊遊渾不忘
畫船攜酒上蘇灣

錦荔枝

柔枝弱蔓不勝春
竹裏薰風錦樣新
滋味雖然異南國
免教長路起紅塵

王修撰鸚鵡圖

不用高飛逐去蓬
鳴鳩乳燕自相從
日斜庭院春聲歇
一樹櫻桃細雨中

錢舜舉江潮圖

錢塘江上怒潮來
萬里天風動地雷
白馬素車應浪說
吳王宮闕已成灰

東林夜月

風靜猿啼月滿山
東林夜色共人閒
柴門正與清光對

分付山童莫上關

畫景寄胡景容

獨樹邊崖葉盡枯
蘿煙竹露共蕭疎
杜陵老病扁舟去
一夜月明湘水孤

湖上書愁

濃如山色亂如雲
滿目春愁殢夕曛
風雨欲來人不
杜鵑啼入岳王墳

畫圖送韓成章還揚州

山岫無心未倦還春來雲鳥共人間滿懷幽意誰堪語
背立東風看故山

溪山夜泊

風靜江波月靜煙不禁涼冷夜如年無人為說清秋意
疑有隔溪漁未眠

易通府以冊索畫為作幽蘭老樹梧竹蒲萄因

附一詩

桑葉歲隳柘葉低東風煙雨暗苕溪一春光景如閒過

水漫危橋草上堤

竹樹圖

白石滄波野自宜
歲寒心事晚猶遲
蕭蕭野影疎疎葉
吹盡秋風君不知

鷺鷥

十載班聯玉笋行
鳳皇池上共翱翔
于今老向山林見
却愛疎閒野趣長

彥敬小景

陰陰綠樹草堂低
曉雨初晴水滿溪
門逕晝長人不到
百花深處一鶯啼

金鉗牡丹

寶架金鉗絕護持
折來應是最高枝
畫堂春色殷于錦
終不如前土種時

久雨抱病邵齋無聊中忽憶吳興舊隱因畫鷗
波春雨亭

一棹煙波載雨還
白鷗相對主人閒
如何誤落紅塵裏

夜夜寒燈夢小山

東岳雲峯圖

盪胸雲氣接空冥
齊魯陰陰未了青
不見當時封禪處
紫煙紅霧滿雲亭

寄所知

白雲黃葉映滄洲
一曲清商送遠遊
人在玉京天萬里
也應難忘故園秋

望遠

水際煙村鳥外山
綠蕪黃葉共人閒
何因遠結漁樵伴
南浦西陵日往還

畫秋意送崔指揮

水湧雲峯碧四圍
天連江色雁初飛
秋風不見汾河棹
人在霜林倚夕暉

村居

暖風吹綠山前草
膏雨染紅溪上花
滿地芳菲春未歇
古林幽屋是誰家

山遊偶興二絕

桃花小雨柳條風
山近高樓窄徑通
一局殘棋日當午
更催童子取焦桐

輕煙縹緲雨霏霏
芳草連崖入翠微
黃鶴不來松自老
野藤花下鵲鳩飛

晚過靈隱寺

飛來峯北寺門闌
合澗橋西水斷灣
落葉滿林僧不見
寒鴉飛盡日沈山

秋江煙艇

山水風煙共一舟清羸詩病不禁秋
殘陽欲盡寒潮落
欲采江蘺寄遠遊

鍾巨川赴任為題看月圖

小山孤月淨流輝石磴高寒酒力微
清賞正濃眠未穩
夜深松露濕秋衣

寫枯木幽篁送陳大用

方洲秋日景荒涼古木幽篁徧草堂
寫入溪藤送君去

情隨踈影共斜陽

獨行寄璇卧雲

清泉白石四無隣
綠樹青山遠近春
落盡桃花人迹斷
只應潭影伴閒身

題畫

雨晴芳渚野鳬飛
楊柳條長荇葉稀
閒展蓬窓看溪水
春痕漸上釣魚磯

寄張景暘前輩

遼海東吳萬里程別來寒暑每關情故園風景依然在
鴻雁來時好寄聲

題戴靜菴畫

蕭蕭葭莢著霜稀秋水連天有雁飛
悵望溪山舊人去
一船斜日映愁歸

題畫

帷帽停陰玉塵閒涼風滿地雨苔斑
不知園綺今何在
獨立殘陽望故山

為秋江題畫

風蕩輕舟白鳥飛
綠波青草蕩春衣
一聲長笛知何處
江上數峯間落暉

蘋花館

宿水停煙綠近牆
蒹葭遶屋共蒼蒼
寒香欲薦無人采
月落空庭夜有霜

趙市懷古

茫茫瓦礫被荆榛
白屋朱門共一塵
燕子歸來人已換

野花開滿舊山春

石倉歷代詩選卷三百八十二

欽定四庫全書

石倉歷代詩選卷三百八十三

明 曹學佺 編

明詩次集十七

周旋

辟雍詩

湜彼其流有環辟雍天子戾止穆穆其容
穆穆其容於焉問道弗煩弗勤有師有保

有師有保聖學緝熙烝哉元后允懷于茲

右三章章四句

送李學士歸省

涼飈倏闌暑星火西南方僕夫理巾車晨起駕周行大
節著朝野蔚為人所望聖皇眷宿德去意何遑遑臣節
未易盡親恩詎能忘雨露沾以濡松楸藹而倉立身罔
知報惕怛中心傷孝治昭盛時睠辭白玉堂封章侈君
惠豈曰戀故鄉胡能昧其原畏彼道路長

霜林晚節圖

朔風何蕭蕭嚴霜亦皓皓維此歲載陰羣芳盡枯槁懿
彼貞堅姿幽寂能自保春風桃李花樹下靡蕪草紛紛
競顏色媚此一時好

送張給事中赴南京

三五星未沒青驪駕言征籍籍祖道筵悠悠遠行程陽
回雪初霽春意亦已生黃門地清要彼此同恩榮求言
在茲日況復須老成勿謂君門遠出納良不輕行矣庶

勉旃慰此離別情

題周萬戶子性扇面月桂

我昔夢遊崑崙峯雲梯咫尺依晴空綠煙掃盡六合淨
身輕八翼飛蟾宮蟾宮境界一何異瑤樓瑤閣相鉤籠
就中丹桂花正發清光奪目飄香風姮娥一見謂仙客
當時許折枝頭紅翩翩見舞羽衣曲鈞天彷彿聞三終
久之但覺毛骨凜逼人寒氣如冬隆覺來明月滿窓戶
一天靈籟鳴山松

和雪齋韻

冀北方辭闕江南覺有春
虎符輝組綬鳳勅煥絲綸
竹馬行遮道蒲鞭不動塵
共言公薦拔豈必為呈身

宿紫虛觀

薄暮遊山觀天低逼少微
地偏人到少仙去鶴來稀
遠岫收殘雨深林翳落暉
不緣簪紱絆容與待忘歸

送同鄉金署正還南京

封章聞聖主馳傳自南京
身立雲霄近恩沾雨露榮
辭

朝初整旆送別若為情後夜逢秋半相思共月明

送尹同府之京

甌江初霽雨別駕上神京柳拂春風軟花迎曉露明
黎氓懷惠澤冠蓋動離情環珮辭朝日重過藹政聲

送劉大尹宰石城

為客逢張鑑求賢薦馬周郎官千里去祖道片時留
候館雞聲曉征途馬色秋君王懷赤子恩澤在承流

送林修撰

自是瀛洲侶年來已二毛
龍頭曾獨占鸞誥已殊褒
德業推先達衣冠偶俊髦
雄文司馬出直筆董狐操
漳水流何已閩山勢轉高
許歸優渥重雨露在宮袍

賀葉明府

述職臣踰萬褒旌僅十賢
問渠誰第一羨子獨為先
宴賜珍羞富衣頒錦繡
鮮辭朝加寶褚乘傳給
官船盛典昭明世殊恩
邁舜年宰臣思效法民
吏候歸旋異績中年並
仁聲密縣肩身臨百里
地名紀九重天美化施
仍

洽貞心秉益堅會看膺特詔補袞五雲邊

次黃養正賞菊韻

黃金花朵照冠裳開正當時近橘陽阿閣秋高通御氣
披垣風細和天香自同葵藿常傾日肯讓梅花不畏霜
歡賞誰如今日樂君王許醉紫霞觴

贈同鄉鮑給事

黃門清切受官初虎榜登名世所譽環珮晨趨迎玉輅
衣冠夕拜奉天書禁庭鵠立朝儀肅直省鶯啼晝漏疎

惟喜鄉隣沾薄宦羊裘退食共紆徐

冬至侍班

佳期又遇一陽生百辟趨朝賀聖明
大樂九成天上奏祥雲五色日邊呈
履長共喜沾餘慶報國難忘致太平
深愧相如宜病免侍班何幸沐恩榮

送江侍郎巡邊

久副秋官獨有功巡邊新命荷宸衷
良平不數侯關內頗牧誰知出禁中
鈇鉞光摩秋月白旌旗影拂曉霞紅

坐令亭障如磐石一點胡塵不敢通

求碧窓葉先生蘭亭書法

碧窓夫子寫蘭亭千載義之契合冥赤手妙探龍虎窟
墨池寒蘸斗牛星韓公自詫軍方張杜老深知筆有靈
賸欲相從學心畫煩君為我講聲形

送李侍御四川巡按

平明奉詔出巖廊萬里西川事激揚玉斧凝霜生勁氣
繡衣籠日帶恩光巴江渡處波濤靜劒閣經時草木香

狼虎聞風應遠避埋輪不讓漢張綱

送江編修還蜀

閭闔初開曉仗移珮環趨向玉階辭行舟慣見巴江險
策馬何愁蜀道危花滿錦城迎望遠詩成綵筆得歸遲
只今帝載須才俊還看夔龍集鳳池

江心寺

江心勝景似蓬萊占斷壺天絕點埃不與人間連世界
却從波裏結樓臺亭亭古塔雙峰起隱隱晨鐘萬戶開

昨夜老龍聽法去滿城風浪殷如雷

銀麓奇峰

芙蓉削翠拂層霄絕頂餘寒暑自消雙鹿迷蹤雲露迥
數螺凝黛海天遙霜清夜識浮銀氣月白時聞響玉簫
我欲與君遊汗漫晚年期此覓松喬

送王都憲督漕

繡衣金帶照青春奉勅南巡一憲臣萬里澄清歸掌握
西都漕運入經綸曉離臺府霜威肅夜度關河月色新

屈指來秋看復命翩翩獅子列楓宸

送同年陳郎中

璽書新捧出金閨五色龍章濕紫泥
足馬北離闕雨霽片帆南度渚雲低
蕭何轉運功須並劉晏經綸志欲齊
後夜相思一回首福星高照大江西

題月下蒲萄卷

驪龍飛出水精宮
嫋嫋長鬚翠拂風
亂吐珊瑚千萬顆
夜深高挂月明中

端陽有感

思遠樓前小雨晴
楚歌聞處若為情
紛紛載酒遊觀客
誰信當年有獨醒

黃諫

公子行

白馬誰家郎
據鞍索嘗酒
笑指青樓邊
欲訪章臺柳
佳人坐樓頭
鳴箏聲更和
千金買一笑
浮生能幾何

古別離

憶初結髮時期與同百年詎料萬里別信音何緲然欲
化山頭石望望雙眸穿徒勞清夜魂時時到君邊歡娛
宛如昨諧于指下絃晨雞遽驚起空使涕淚漣擁衾發
長吁斜月窺窓前

君馬黃

君馬黃臣馬赭兩馬相馳在郊野赭馬汗血猶未乾黃
馬精神宛如畫黃赭格骨亦相類要使成功重當世迢
迢玉塞邊塵稀誰識沙場辛苦時

戰城南

戰城南天日慘積骨如丘塞煙晚輕身長劍覓封侯萬
里胡為不生返我軍已戰勝彼軍遂傾覆忍使天寒聞
鬼哭全生無功空碌碌

將進酒

將進酒歌莫停人生不滿百酒盡還須傾吁嗟世事只
如此常醉何須誇獨醒君不見東家有酒不解飲西隣
碌碌勞此生何如劉伶終日醉千秋萬古留其名

巫山高

巫山高夾青天一葉扁舟通石罅數行客淚落哀猿蜿
蜒綿亘百餘里瑤姬封此知何年朝雲暮雨相往旋朝朝
暮暮陽臺前楚王何事來入夢詞客因之空浪傳巫山
之靈尚未泯至今雲雨已渺然峽中流水向東去猿聲
夜夜聞江邊

宛轉歌

月已高天寒酒易銷銀缸頻自剔玉枕為誰調歌宛轉

宛轉清且怨有淚恨偏多無眠思還亂夜已半雲靜星
河爛寶鴨夜涼消銅龍寒漏斷歌宛轉宛轉怨且長相
思江水遠夜夜那得忘

楊白花

楊白花白如雪狂風一夜起長秋吹落江南踪已絕漫
天飄蕩惹人情落日清歌思未歇

自君之出矣

自君之出矣迢遞玉關西思君心萬里隴樹曉煙迷

自君之出矣遠戍向輪臺思君望征雁不見帛書來

五雜俎

五雜俎乖空霓往復還武陵溪不得已守空閨

又

五雜俎錦迴文往復還戍邊軍不得已要和親

從軍行三首

萬里塞邊城年年擁重兵秋風鳴鐵騎落日照旄旌
白骨蒼煙晚黃雲塞草秋貂蟬雖足貴聞說出兜鍪

晚雲添殺氣夜角送邊愁年少輕生者于今已拜侯

軍中五更轉

一更人已靜月出上營門休嗟鐵衣冷贏得錦袍溫
二更風色冷警柝聲不歇荷戈夜未暝坐看帳前月
三更更漏永起舞發長歎試拭鵑鴛膏臙教劍光爛
四更霜已下長嘯一聲秋冷光慘馬色寒氣肅貂裘
五更星半稀營中鼓角悲仰天試長吁吐作橫空霓

附柯潛

字孟時莆田人
景泰二年狀元

送邦紀弟赴通州學士

旭日耀層漢輕風吹碧漪行程渺何許征馬焉可羈當
時送歸客中懷亦悽如況此骨肉親胡能不傷悲強持
一樽酒為汝陳諷規去去登泮學冠裳肅威儀展席坐
清晝橫經講軒義梁肉何足嗜飲水足忘飢勗哉崇令
德庶以慰我思

山水圖為兵部郎中王恕題

玉堂清暑春風前焚香看畫皆神仙畫中風物得真意

峯巒隱約生雲煙大山如龍欲飛去小山盤盤如虎踞
奔流一道破山來散作濤聲滿江樹遠村微茫三兩家
古渡無人橫斷槎近村茆屋蔭榆柳門前沃土饒桑麻
別有高亭向洲渚斜日滿簾水禽語滄波浩浩欲吞天
蜃氣昏昏欲成雨初疑匡廬山下落星灣又似洞庭湖
上之君山瓊宮貝闕倚霄漢無乃蓬萊方丈非人間我
生慣識山中樂隨意雲樓與山閣故鄉一別今十年石
洞梅花幾開落臨圖忽憶舊遊踪便欲沿溪上丘壑此

身留滯未應歸回首江天雲漠漠

讀陳忠肅公傳有感

戰塵捲空天地黑鐵騎長驅滿南北厓山孤主知存亡
一夜愁心頭徧白丈夫恥作負恩生舉手擎天天已傾
孤城如斗猶百戰蒼蒼不遣功勲成龍虎可騎不可擾
怒氣吹人山亦倒君臣大義心自明白日清天懸皎皎
嶺外間闕草樹寒四顧無人空淚彈國破家亡惟一死
首陽有薇那忍飡節義文章埋不爛萬丈虹光燭霄漢

我懷往事悲復歌烈烈英風鬢絲亂

僊溪龍華寺

寶雲山下煙霞古老樹如龍欲飛舞花氣薰成五色雲
泉聲散作千林雨我愛溪山事事幽錦袍醉踏東風遊
題詩淨掃巖頭石把酒還登竹外樓空門自與人間別
夜榻焚香卧清絕明朝長嘯拂衣歸閒却溪風與山月

詠舊朝靴

記得初成日先朝禁直臣動移當輦轂步履上星辰待

漏清霜滿乘春玉銕新舊逢時綻裂猶有玉階塵

送簡討莊孔陽桂陽判官

鐘聲催曉騎寒色上重裘笑別鵷鴻侶遙臨山水州
直言非不用高志自難酬公暇閒吟處風清月滿樓

遊囊山寺

下馬松關外行行過虎溪鐘鳴知寺近雲暝覺天低
澗底流泉滑簷頭古木齊何時謝塵鞅此地卜幽棲

送章編修德懋令臨武

獻疏黃金殿英英志不回遷官無愧色治邑有餘才點
易臨溪閣橫琴坐石臺間情幽賞絕猶勝在蓬萊

辟支巖

攀雲臨絕頂一望海天空野色斷橋外鳥聲高樹中煙
凝芳草碧苔襯落花紅萬慮都消却長歌送暮鴻

送行人司正邵震使安南

天王出震繼虞唐宇宙重新化日長要使車書歸一統
遙頒正朔到殊方碧天盡處通容管瘴雨晴時過富良

珍重平生清苦節莫將薏苡載歸囊

送嚴弼中之歸安

拜命之官屬妙年圖書萬卷載吳船
煙迷芳草碧千里
水汎落花紅半川
自喜養親榮有祿
誰言坐客冷無氈
應知苕霅多吟況
好為題詩寄錦箋

石倉歷代詩選卷三百八十三

欽定四庫全書

石倉歷代詩選卷三百八十四

明 曹學佺 編

明詩次集十八

陳贄

老將行

憶在羽林年少時飛鞚慣將生馬騎自憐生忝將門子
寧比長安狂狹兒二石雕弓不虛發幾從大將西出師

左挾蛇矛右龍劍
斬除虜寇如蒿藜
未數嫖姚功第一
奈何李廣數偏奇
自擬勛名垂不朽
蹭蹬豈知今皓首
丹青空復想圖形
金印何時得懸肘
投老歸耕南畝田
垂竿坐蔭前溪柳
萋迷草色綠盈門
冷落山光青入牖
數畦學種邵平瓜
一巾自漉淵明酒
平生膽氣壯凌雲
世事于今寂不聞
桑柘斜陽荒巷裏
無人識是故將軍
虎帳不談三畧法
龍泉深閤七星文
昨來聞有沙場警
詔下三邊急募軍
我雖矍鑠休相笑
一戰猶堪策異勛

桃源行

雲山重疊溪水春
漁舟遠去茫無津
但見桃花萬千樹
寂寂何曾逢一人
登岸縈紆遶山隩
壑轉林開見原陸
忽聞雞犬隔煙蘿
似有人家住深竹
竹畔誰歎邂逅逢
衣冠不類今人服
問知此地名桃源
陰陰亦有桑麻園
自緣物外風光別
不比人間塵俗喧
東隣西舍須臾集
爭向漁郎問鄉邑
如今世上是何朝
從來此地無人入
復云先世來此間
子孫遂爾不知還
三春處處桃花雨

四顧茫茫青黛山漁郎自念何曾見出山須當報州縣
身到仙家非偶然再擬來從此游行歸途一一紀行蹤
不謂雲林即更變堪笑漁郎憶頗深重尋迷却舊山林
臨風何必空惆悵仙境由來不易尋

燉煌太守後庭歌

太守治郡人稱賢郡中無事時高眠近聞境內出異泉
甲兵不試人力田太守胸次何坦然到來燉煌將五年
譙樓角殘月在天後庭為我開錦筵紅粧翠袖艷且鮮

金翹插髻貼翠鈿翩翩舞向畫燭前嬌歌一曲歡無邊
明日欲行懶着鞭如此樂事直萬錢太守愛我情獨偏

古大梁行

大梁城外遶秦莽繁華不見當年人信陵賓客散已久
魏王宮闕成埃塵何處往來車馬市斜陽枯柳鳴鳥起
歌舞散為煙霧空衣冠變作蓬蒿里舊事淒涼何足論
古城壞堞至今存紛紛野鼠走穴外唧唧寒蛩鳴草根
經過不覺傷懷抱疊謝層楹成蔓草屠中壯士安在哉

何處夷門古時道幾人富貴誇封侯空遺白骨葬山丘
年年只有黃河水還繞大梁城北流

寄宿田家

楊柳垂垂水滿陂田家茅屋住于茲每聞鳥語知春候
常聽蛙聲卜歲時雨過田間留虎跡泉鳴簷外落魚池
日暖機聲響蘿薜夜深燈影隔茅茨留人共酌樽中酒
邀我閒題壁上詩苦竹叢邊叫姑惡菰蒲汀畔集鷗鷺
解招陶令來同隱却笑楊朱枉泣岐今宵借宿情難盡

明日臨風那忍辭

代閨人答輕薄少年

綠波漾漾芙蓉池
粉牆楊柳窳地垂
自憐玉貌金閨裏
誤嫁五陵年少兒
五陵年少多輕薄
結交豪俠輕許諾
揚鞭紫陌競驅馳
醉酒青樓恣酣樂
擊鞠每來桃李園
或過韋曲借花看
着處遨遊不回顧
豈惜春閨花易闌
燕語鶯啼春欲晚
走馬章臺竟忘返
捲上珠簾顰翠蛾
草色青青望中遠

雁門邊人歌

雁門東去連幽燕回人家近雁門邊
惟憑射獵給衣食却笑漢兒空種田
西風荒壘見殘燒夕陽古戍迷寒煙
葡萄酒對可敦飲日上穹廬猶醉眠

代賀拔今譽贈沈千運

別鄉歲久身幸存歸訪隣翁問子孫
松楸落日多新塚桑柘秋風減舊村
田荒半是牛羊道雨過水流方浩浩
白鷺窺魚立苔石野鹿公然來食麥
舊日居人在者稀

亦有飄零未歸客
南北驅馳幾歲年
白頭方得返林泉
逢君話舊沾村酒
對酒傷懷各悵然

送人松滋

君不見巫山高入萬重雲
繞山雲氣長氤氲
不因日出天清朗
十二碧峰那可分
神女行雲誰復來
襄王空有舊時臺
君今去作巫山尉
日聽啼猿知幾迴

古意

井梧蕭瑟秋月明
輓轡高懸青絲索
脉脉雙星隔絳河

寂寂孤螢流綺閣坐聞清漏咽銅龍銀塘玉露零芙蓉
魂夢悠悠向何處十二巫峯雲萬重

王昭君詞

丹青豈相誤難貌傾城人可憐漢宮嬌艷質去作穹廬
憔悴身泣上凋鞍向邊去感損嬌娥對誰語風沙蕭颯
塞草秋迴盼秦雲雙涕流未得君王一朝寵空寫琵琶
千古愁琵琶轉彈愁轉多玉顏博得天驕和至今塚上
青青草能使行人哀綺羅

銅雀臺

嬋娟絲雲裏高臺知幾層日日空歌舞含淚望西陵惆
悵君王無復來輦路東風生綠苔昔日繁華竟安在後
人過此空徘徊君不見遺令分香賣履時丁寧似有無
窮悲可憐漳水東流去芳草萋萋鄴城路花落鶯啼春
又歸不見望陵歌舞處

涼州行

四野黃沙何浩浩涼州城外往來道防秋半是他州兵

幾向窮邊增築城城頭一望雲漠漠不知何處是咸京
漢兒年來娶羌女羌兒能為漢言語雖資牧畜是生涯
近學耕鋤仍種黍雪花片片拂羶衣望見狼煙遠起時
將軍須臾急傳令滿營皆豎長旌旗月落嗚嗚吹畫角
帳中猶作龜茲樂

田家行

田家風景亦可悅人比城間語言別楊柳垂垂塘水清
茅屋時聞機杼聲籬邊綠綠禾苗長水際青青蘆笋生

隔岸好山如畫軸我偶過之看不足夕陽何處笛鳴鳴
牧童歸來跨黃犢田家莫嫌生計薄縣吏不來心便樂

賈客樂

向來賈客西江多江湖來往慣風波船艖多泊下江口
白晝算緡夜飲酒吉日行程預有期同來船伴勿相離
解纜津頭秋雨歇落帆浦口夕陽遲行遇鄉人說鄉語
早晚當過雲夢渚黃鶴樓前住幾時醉酒倡家逢舊侶
荆南未已復江東歲歲年年羈旅中若論骨肉長相守

不及滄江垂釣翁

北邙行

洛陽城北往來道北邙山下迷煙草喪車前頭唱挽歌
丹旌素幘高嵯峨洛城日日喪車出城中車馬依然多
豪家墓碑百餘尺鑿徧北邙山下石累累古墓多無主
清明誰與增新土荒涼落日野烏啼蕭颯風吹白楊樹
人如欲免北邙愁除是驂鸞翳鳳遊

讌客詞

紫駟馬卸黃金羈玉壺勸酒客不違酒行到手即須飲
古稱七十人間稀主人有酒知幾石拍拍浮缸酒水碧
醉來起舞向花前顛倒婆娑裏烏幘明日與君分散去
黃鳥空啼綠楊樹

晚次樂鄉

關河歎迢遞疋馬遠徂征落日見荒店輕煙生古城鐘
聲知寺近溪漲與堤平山館孤吟夕清茄何處鳴

春夜別友人

庭樹夕浮煙花香入錦
筵醉歌翻楚調遠道出秦川
簾影留殘月鐘聲促曙天
他時各相憶記取愴離年

早春遊望

時光不待人又見物華新
雲淡楚山曉雪消湘水春
青回孤戍柳綠轉一洲蘋
鄉國經年別臨風獨岸巾

遊少林寺

步入招提境鐘聲出紺林
逕鋪苔蘚滑龕隱薜蘿深
嵐靄初疑霧溪雲易作陰
老禪供茗罷相對一閒吟

早發平昌島

泊舟孤嶼下解纜未明前浪影帶殘月山光浮曙煙微
霞初映海新漲漫迴川起向孤蓬倚吟懷正浩然

夜宿七盤嶺

迢遞登危嶺煙林日已西且投孤館宿遙見衆山低飛
瀑雲端響清猿月下啼羈人不成寐俄聽遠村雞

送東州李使君

羣峯高插天處處響啼鵑馬去登雲棧猿來飲澗泉稅

商收藥品編戶足山田五袴歌謠起使君今更賢

送楊長史赴果州

逢君共杯酒征旆又西之想見馬行處正當雲起時吏
迎山半驛鼓響樹間祠後夜對明月那堪聞子規

送友人南歸

極目楚天迥南還趣不稀晚山殘雨歇春水片帆歸客
路鶯花老家林笋蕨肥故人攜酒過為爾浣征衣

送丘為下第歸江東

杏園迷捷徑惆悵一番春馬踏落花去愁隨芳草新碧
溪尋釣侶白鳥識詩人榮達休嗟晚山陰有買臣

歸嵩山作

嵩岳堪歸隱無能只願閒心隨雲共遠身與鶴同還黃
菊閒秋徑丹楓映晚山地偏無俗轍終日掩柴關

山居即事

山家白板扉綠樹帶斜暉甘作漁樵侶從教車馬稀閒
吟蘿薜徑旋補芟荷衣童子去沽酒月明猶未歸

冬夜書懷

孤吟踈雨後寥落向深更殘燭獨相照清砧何處鳴客
懷祇自遣功業歎無成坐惜流年度鏡中華髮生

觀獵

清笳拂曉鳴獵騎出秋城鷗入雲中響鷹翻草際輕天
低遙合陣日暝各歸營所喜邊塵息三軍樂太平

南州有贈

南州一相見悵望此時心春去落花盡雨餘芳草深當

年同倖直今日共閒吟各有思鄉淚淒然滿客襟

留別友人

惆悵一樽酒惟君知此心試看流水去未抵別情深北
望家何在南還意莫任天涯對明月為爾一沾襟

臨江亭

凭欄對渚禽雲過半江陰蕭颯蒹葭雨蒼茫橘柚林問
津人已遠懷古意何深俯仰乾坤內誰能識此心

詠山泉

泉脉來何處山人未識名懸厓飄練影漱石韻琴聲暗
滴空潭響遙添澗曲平塵纓宜此濯心迹與誰清

與諸子登峴山

羊公歿已久殘碣尚留今如此江山在幾陪冠蓋臨碧
天連水濶白鳥入雲深往事從興感長歌豁素襟

秦中寄遠上人

歸來尋舊隱尚缺買山資幾度對明月令人懷遠師閉
門稀客過覽鏡覺容衰未解祛塵縛浮生益可悲

赴京途中遇雪

萬里巴川客驅馳笑此身
關山逼殘臘雨雪正愁人
柏酒誰能獻蘭燈只自親
明朝歲華改白髮鏡中新

遇故人莊

故人營別業農父作隣家
山色當窓好溪流遶屋斜
襟懷付魚鳥生理在桑麻
濁酒能留客東籬菊正花

號宮送何丞市馬

野色迥蒼蒼歸鴉帶夕陽
賓朋傾別酒騶從促行裝
山

晚煙浮紫林秋葉墮黃好求千里駿持以奉君王

高官谷訪鄭鄠不遇

載酒遙相訪何期不遇君綠蘿深護雨碧樹淡籠雲隔
崦聞樵唱穿林散鳥羣躊躇歸路晚煙靄正網緼

晚發五溪

巴川移短棹正值暮秋天客路猿聲裏鄉山雁影邊兼
葭連晚渚纒極滿秋田風物雖堪戀其如歸思牽

舟泊盱眙

淮岸扁舟泊天空秋氣清漁燈明近渚霜月照孤城沙
際聞人語蘆間有雁鳴夜闌歸夢醒歌枕若為情

題慈恩寺振上人房

蘿逕穿雲入禪關倚澗開灑衣涼雨過抱子暝猿來磬
響翻經室香消施食臺支郎留下榻清話竟忘回

送李中丞

昔年曾受鉞萬里總王師虎帳談兵夜龍沙破敵時丹
衷明主識姓字遠人知今日湘江路扁舟何所之

雨中過袁稷巴陵山居

山中誰是伴雨過綠蘿垂今日來相慰明朝又別離
林疎多落葉菊老有殘枝咫尺洞庭水風波君不知

新年作

謫宦逢新歲孤吟思惘然驛梅開臘後岸柳得春先
棹倚清溪月猿啼碧岫煙天涯留滯客歸去是何年

松江獨宿

江上扁舟泊羈懷向月愁鄉關千里夢砧杵幾家秋
漁

火明沙渚蟲聲近荻洲孤吟不成寐歌枕對眠鷗

途中送權曙

楚地久為客別君情更長歸心隨去雁遠樹帶斜陽蘆渚初飄雪楓林欲醉霜安能逐漁父鼓枻詠滄浪

送李中丞歸本道

鑾坡重拜命龍節又離秦義膽酬明主歡聲動遠人馬嘶邊驛曙鶯嚶舊營春早見歸廊廟如今息虜塵

仲夏江陰官舍寄裴明府

江郭雖卑濕心清身自安
槐雲深院靜梅雨小窓寒
酒熟還留客潮生可凭闌
寄言彭澤宰休道嬾為官

送僧歸日東

神京往來久何事又東行
路指扶桑迥杯浮碧海輕
歸心渺雲影靈唄禱濤聲
後夜遙相念茫茫月共明

喜外弟盧綸見宿

茅屋少相隣君來不棄貧
地偏無俗轍年老作閒人
燈下啼螿近窓前落葉頻
對床因聽雨款曲話情親

經廢寶慶寺

古寺何人到巖花只自開
有時聞鳥哢無復見僧迴
殘碣埋荒草虛龕繡紫苔
從來有興廢過此不須哀

送別錢大

風笛離亭上淒涼那忍聞
心隨流水去路過小橋分
浦樹含秋雨江帆入暮雲
不知從此別何地更逢君

汴路水驛

泊舟依水驛堤樹晚含風
魚躍翠萍裏鷺拳青草中
人

家如潁上風景似江東杯酒自斟酌故人那得同

春日留別

江上草離離江頭折柳枝那堪別君日又是落花時飛
蝶隨行李啼鵲惱夢思他時肯相過應不負幽期

宿江店

今宵宿江店門外有蘆花到縣無十里為隣只數家燈
明茅屋小月轉竹籬斜忽聽歌聲起漁舟傍淺沙

山中贈日南僧

此處結菴久故山天一涯遶簷間數竹汲澗自澆花晨
擊香臺磬宵分石鼎茶雙峯已堪老無夢更思家

奉和聖製從蓬萊向興慶閣道中留春望之作
蹕道塵清入望賒秦川下遶漢宮斜霓旌曉拂江堤柳
雉扇晴迷苑樹花處處笙歌隨御輦重重臺觀即仙家
職居獻納慚無補也得從容扈翠華

送少府貶柳州

憐君謫宦向邊庭對酒愁聞歌吹聲落日茫茫鄉思遠

滄江渺渺客帆輕
楚猿嘯月過衡嶺
越鳥啼煙傍柳城
賈傳投械弔湘水
至今流恨未能平

同溫丹徒登高萬歲樓

望中雲樹遠依依
傍水人家煙火微
斜日海門潮欲上
西風江郭雁初飛
鄉園迢遞音書隔
旅泊蕭條故舊稀
惟有金焦山色好
高依樓閣翠成圍

寄司勳盧員外

書劍年來寄洛陽
幾迴吟賦不成章
花前誰共金樽酒

月下空懷畫省郎
歌枕客窓頻有夢
鳴珂禁署憶含香
黃鸝最是多情鳥
時弄春聲在綠楊

與仲弟兵曹讌集

索居誰與話襟期
舍弟能來慰我思
窓外花枝堪對酒
夢中池草易成詩
正當綠樹鶯啼處
待得清溪月上時
且盡金樽同一醉
雲臺勲業未為遲

送陸澧倉曹西上

臨歧把袂思依依
行役何時暫息機
闌樹微茫人去遠

鄉心迢遞雁來稀
鳴珂早見趨楓陛
載酒誰還款竹扉
都下若逢相識問
滄洲將老芟荷衣

別嚴士元

送君迢遞出江城
啼鳥關關綠樹晴
雨過滄洲春草色
日斜煙寺暮鐘聲
湖南歸客應多夢
天際孤帆不盡情
別後相思空對月
一杯何處叙平生

賦得

車騎西征是幾年
玉關迢遞路三千
烏啼窓外日當午

角怨樓頭霜滿天錦織迴文空寄恨燭流殘淚未成眠
不堪倚徧闌干曲目斷黃雲益渺然

送馬秀才落第歸江南

臨歧勸酒莫辭頻相送東郊草色新馬上鷄聲函谷曙
天邊帆影洞庭春明年再結看花伴今日誰憐失意人
別後相思何處是南樓望月欲沾巾

青溪口送人歸岳州

青溪溪樹葉初飛野渡蕭條過客稀落日天邊孤鳥沒

秋風江上片帆歸吟詩已見添新稿把釣還須訪舊磯
我亦欲尋鷗鷺伴短篷煙雨綠蓑衣

晚次鄂州

客帆收處近江城偶遇鄉人問去程夢渚白蘋寒雁下
漢陽紅樹暮煙生故鄉又是經年別夜月空憐幾度明
吟倚蓬窓思無限幾家砧杵散秋聲

送長沙李少府入蜀

路入瞿塘征棹遲此行應未卜歸期九秋雁影雲邊去

三峽猿聲月下悲
桑落酒香江店日
芙蓉花謝錦城時
夕陽樓上頻回首
湘水巴山有所思

送友人遊江南

客程南去景偏新
惆悵離歌起暮津
綠樹紅橋沽酒市
清江白石浣紗人
鐘催曉月過吳甸
帆趁寒潮到富春
碁客詩僧相見好
莫因吟賞滯歸秦

登柳州城樓寄漳汀封連四州

一上層樓望八荒
鳥牽愁思入蒼茫
西風邏騎巡蠻徼

落日啼鴉在女牆
瘴雨來時淒客況
夷歌起處斷人腸
遙憐彼此俱遷謫
試問何年歸故鄉

南原望漢宮

漢宮猶有昔時名
落日荒郊望去平
白鳥遙從煙際沒
綠蕪多向雨中生
川原不盡登臨意
今古徒興感慨情
金殿玉樓俱寂莫
青山依舊片雲橫

夜投豐德寺謁海上人

香臺閒夜誦經聲
偶遇山僧問姓名
燈剪松窓留客話

月明蘿逕少人行茗甌飲罷心塵淨石榻眠來夢寐清
他日遠公容入社還從此處學無生

宿淮浦寄司空曙

客邊還仗酒消憂千里關河歎遠遊秋盡楚鄉逢落木
雨來淮浦駐扁舟流光冉冉人將老往事滔滔水共流
歌枕夜深偏不寐誰家吹笛岸西樓

送韓侍御歸山

乞身纔出五雲間笑脫朝簪一騎還在昔清風滿臺閣

如今歸興繞溪山
家園霜果行當熟
巖寺煙蘿幾度攀
啼鳥隔窓催睡起
柴門無事不須關

送汀州元使君

暫離天仗君休惜
共賀專城是顯官
身佩竹符辭曉闕
吏迎蘭棹過秋灘
行春或駐花邊馬
賞月還凭竹外欄
見說好山當郡舍
雨晴長是捲簾看

寄和州劉使君

郡人無訟官多暇
春酒何妨瀉玉瓶
車騎閒過楊柳陌

笙歌宜醉藕花亭江邊煙草鋪堤綠樓外雲山隔岸青
我有新詩遙寄與憑誰吟向使君聽

錦瑟

參差雁柱架朱絃綺席聽彈憶往年漢苑風恬飛乳燕
巴山月落訴啼鵑芙蓉碧沼涼含露楊柳芳堤暖颺煙
却笑江州老司馬琵琶一曲已潸然

行經華陰

西華山高近玉京芙蓉千疊畫難成白雲深處仙壇古

翠藹浮時嶽雨晴渭水波聲流去遠秦川草色望來平
棲巖多有燒丹侶應笑紅塵役此生

金陵懷古

結綺臨春事已終後庭玉樹舊歌空青山雲鎖梁朝寺
綠草煙荒晉代宮淮渚芙蓉零露曉冶城楊柳散春風
如今却值昇平世金碧樓臺霄漢中

伊州歌

何事遼西將經年未息兵遙憐荷父老月黑夜移營

山中送別

別去空惆悵蕭然掩竹扉
山中紫芝老君定幾時歸

鳥鳴磻

暝樹含蒼靄春雲散碧空
如何幽磻鳥啼向月明中

木蘭砦

青山明夕陽白鷺立秋水
忽聞漁笛吹令人思無已

竹裏館

幽館萬竹中秋聲助吟嘯
來此欲忘歸深林漏斜照

池萍

曉池雙白鳥飛去復飛回一片浮萍合輕撓撥不開

山中寄諸弟

城間多樂事獨此歎離羣倚杖看飛雁行行入楚雲

班婕妤二首

長信秋風早宮槐葉半疎淒涼泣團扇空復候鑾輿
玉階華露滋金輦來踪絕涼吹拂羅幃飛螢自明滅

春江曲

玉樹綠沈沈流鶯啼滿林春波搖不定真可比郎心

洛陽道作獻呂四郎二首

洛城春雨餘夾道垂楊綠歌管綺樓人朝朝歡未足
挾彈冶遊子金丸手中把忽聽啼鳥聲勒住青驄馬

洛陽道

春日洛陽陌紛紛來往人落花如有意飛逐馬蹄塵

長干行

住近白門下浣紗淮水側背立向東風低頭怕人識

江南行

明妝蕩蘭橈兩兩度橫塘
忽聽歌聲起悠悠雲水鄉
江渚秋風起荷花漸覺稀
小舟閒並看日暮未言歸

古意

玉階淒風起桂花落如雪
羅幃銀燭微啼螢怨明月

流水曲

日晚潮初落白蘋花滿洲
中流船渡急欲住苦無由

長信草

宮草寧無意先從靜處生青青長自好玉輦不來行

采蓮

深入荷花裏紅妝映碧流香風傳笑語不見木蘭舟

采蓮曲

多情堤畔柳裊裊學纖腰日晚菱歌起歸舟趁落潮

送人還剡中舊居

短棹沿溪入煙村帶夕陽山中春雨過幾許藥苗長

同諸公有懷

為憶同袍友如今不在門只因為客久識得異鄉言

春草宮懷古

故宮芳草色寂莫幾經春
草上雙胡蝶飛飛來近人

送張十八歸桐廬

臨流相送處暝色起煙村
野艇隨潮去更深想到門

送方外上人

錫影凌秋雲深入千峯住
他日欲相尋清鐘響何處

聽彈琴

孤琴奏明月松泉夜生寒豈無古時調不堪今日彈

對殘燈

寒燈伴吟久夜深微欲滅孤客未成眠尚惜紅蕤結

同褒子秋霽獨宿

秋聲在何許瀟瀟一庭竹明月入疎櫺來照幽人宿

酬李益

憶昔去江東思君夢寐同紅顏容易老相見各成翁

贈別司空曙

話別秋堤畔寒蟬聲更悲夕陽孤棹去正是落潮時

江行無題

雲帆秋水濶煙樹晚村深閒倚孤篷久遙聞風外砧

宿洞口館

冷猿溪上嘯寒溜檻邊鳴此處往來少滿庭秋草生

登樓

飛甍侵碧漢人語半空間雲際橫眉黛不知何處山

留別顧明府

滄江春雨餘離離汀樹濕樽酒不成歡東風去帆急

三閭廟

湘水流無盡江離煙雨深古祠人罕到鶻鴂怨春林

惜春

落花飛陣陣無計可留春酒到休辭滿啼鶯亦勸人

零陵早春

草色迴晴渚禽聲動曉原春風自此去幾日到家園

長沙驛前南樓感舊

此日成長別茫茫度幾秋湘潭今夜月惆悵獨登樓

野田

田荒盡秋草牛羊踐成道牧兒吹笛歸蕭蕭野棠老

宿雲亭

地偏人跡少亭子面山開最是秋簷外閒雲去復來

惜花

無奈花零落枝頭頓覺稀殘紅真可惜拾取袖中歸

岸花

溪上花如錦繁枝映柳條遊人最相惜來此久停橈

寄西峯僧

山溜細涓涓松庭夜鶴眠西峯殘月墮趺坐佛燈前

送別

東風江上柳絲絲此際分襟更覺悲後夜他鄉對明月
相思却念別離時

明妃詞

雪片紛紛帳外飛曉寒微透縷金衣漢宮迢遞知何處

只有清宵一夢歸

曉臨妝鏡默含悲
還把琵琶寫怨詞
玉貌可憐憔悴盡
如今不似漢宮時

涼州詞

哀笳遙起戍樓間
少見平原多見山
惆悵葫蘆河上客
立殘斜日望鄉關

西宮春怨

錦屏愁倚懶焚香
寂莫西宮晝長
鳳輦不來庭草綠

隔溪啼鳥送斜陽

青樓怨

春深楊柳花拂樓間理琵琶自寫愁惆悵玉闌人去遠
珠簾不忍上銀鈎

采蓮曲

荷花紅似錦新裁碍着蘭橈撥不開湖上鴛鴦如有意
一雙飛近畫船來

重別李評事

酒盡離杯欲別難
祇憑書札報平安
明宵何處孤舟泊
露濕蒹葭月色寒

李倉曹宅夜飲

紫醞金罍共客歡
獸爐紅處不知寒
吳姬二八能歌舞
況是華堂燭下看

除夜

一燈相對不成眠
坐數寒更意惘然
惆悵故園歸未得
客窓明日是新年

塞上聞吹笛

探騎遙從大漠還誰吹羌管夕陽間
梅花楊柳俱零落
一夜歸心遶故山

首宿嶺寄家人

塞外無花少見春故園回首淚盈巾
想應寂莫深閨裏
燈下縫衣寄遠人

送人

蕭蕭行李驛西頭一曲離歌唱未休
君過汾川試回首

白雲黃葉滿山秋

楓橋夜泊

江風零落暮秋天
月照孤蓬客未眠
一曲吳歌數聲櫓
不知何處夜歸舟

送裴郎中貶吉州

數聲風遠楚江頭
把酒相看別淚流
萬水千山明月夜
知君何處泊扁舟

贈崔九

長鈇彈時對酒歌青雲路遠欲如何黃金已覺牀頭少
白髮空憐鏡裏多

過鄭山人所居

東風桃李滿晴園策杖看花到水源蘿屋數椽雲樹裏
萋萋芳草舊柴門

寄別朱拾遺

十載滄浪垂釣者徵書遠召愧無能明朝江北思君處
雲樹重重是秣陵

尋盛禪師蘭若

葉堆荒徑草盈阡野寺鐘聲隔暮煙林下老僧頭似雪
焚香洗鉢度年年

滁州西澗

纔看潮落又潮生楊柳渡頭漁笛鳴綠草滿汀春雨過
青山隔岸暮煙橫

寒食寄京師諸弟

杜陵寒食思諸弟京國笙歌不共聽獨坐小齋成寂寞

捲簾空對晚山青

休暇日訪王侍御不遇

尋君今日偶乘閒
君向南莊久未還
策馬欲歸仍駐馬
雪晴貪看隔溪山

登樓寄王卿

此時登覽恨難同
楚水吳雲望不窮
一簇帆檣秋浦外
幾家砧杵夕陽中

寒食

東風開徧滿城花
車馬遨遊日未斜
惟有草玄人寂莫
綠苔門巷似山家

聽隣家吹笙

玉笙聲度隔春霞
疑是當年子晉家
深鎖重門人寂寂
東風飄出粉牆花

栢林寺南望

日暮忽聞溪上鐘
僧家樓閣出巖松
偶來此處憑欄望
雲散層層見碧峯

江村即事

月落江村歇釣船歸來高枕綠簑眠無端一夜西風起
吹向垂楊古渡邊

古詞

杏花窓外雨初乾繡幕低垂護曉寒欲畫雙蛾近時樣
每臨妝鏡却羞看

湘南即事

蘆荻花飄楊柳衰雲山望望隔京師湘南自古多離恨

況是猿啼雁叫時

旅次寄湘南張郎中

江上鷓鴣朝暮聲不堪汀月照人明
春來此處無歸雁誰寄音書到洛城

宿昭應

太乙空存漢武壇如今無復有祠官
龍旂鳳輦知何處松柏蕭蕭夜月寒

早發破訥沙

黃沙漠漠雁初飛昨夜天山探騎歸一曲哀笳吹曉月
征夫聽此盡沾衣

宮怨

銀餅寂莫不焚香簾捲梧桐又夕陽別院笙歌嫌夜短
長門無奈漏偏長

題明惠上人房

閒庭風細落藤花煙出山房飯煮麻頭白老僧初定起
一簾飛絮撲袈裟

汴州聞角

笛聲不似角聲悲
舊曲新腔世罕知
正是離人愁聽處
汴州樓上夜深吹

和練師索秀才楊柳

東風輕颺萬條絲
不折長枝折短枝
玉笛聲中無限意
幾迴曾向月中吹

柳州二月榕葉盡落偶題

山城春盡意淒淒
迢遞秦關望去迷
雨後滿庭榕葉落

不堪時聽越禽啼

銅魚使赴都寄親友

溪頭山色雨晴初
村落人家曉趁墟
邂逅相逢入京使
天涯含淚寄鄉書

夏晝偶作

薰人暑氣濃如酒
時有清風入虛牖
午夢如何驚覺來
花外丁東鳴藥臼

伏翼西洞送人

風暖碧桃花正開
別君未久望君回
世人不識桃源路
休引漁郎入洞來

上陽宮

廢宮春草正離離
零落殘碑字可疑
黃鳥若知舊時事
殷勤啼遶綠楊枝

綺繡宮

零落山花玉殿空
殘碑猶記舊離宮
綺羅盡逐浮雲散
惟有野鶯啼暖風

華清宮

華清樓閣勝仙家
樹樹垂楊處處花
浴殿泉香春正暖
清明時節已嘗瓜

送蜀客

月落山城聽曙雞
歸途應過滾東西
錦江煙樹空濛際
何處聲聲謝豹啼

寄李勣

躑躅花開處處紅
遙聞煙寺夕陽鐘
想騎款段青山下

吟看溪西雨後峯

蠻中

蠻溪雨過葉皆流
落日猩猩啼樹頭
高竹亂藤茅屋小
不知村落屬何州

間行

老去盡將名利遣
原南水北或間過
偶經昔日歌鐘地
秋草荒涼落葉多

城都西

濯錦江頭芳草綠成都新酒家家熟有錢且向酒家眠
勸君莫去臨邛宿

涼州詞

黃沙磧迥塞雲低苜宿秋來長作齊何處戍樓羌笛奏
雁行驚起日將西

隴頭汨汨水長流白草黃雲總是秋月下征夫吹簞簫
曲中多半奏涼州

石頭城

石城依舊青山繞
城下寒潮自往回
記得秦淮泊舟處
雁聲啼向月中來

聽舊宮人穆氏歌

紫閣瓊樓拂絳河
天風吹下玉人歌
如今重聽貞元曲
空向樽前感慨多

竹枝詞

月落秣歸啼樹頭
巴江日夜自東流
百丈牽船上灘去
風波節節替郎愁

千重亂石萬重灘自古人稱蜀道難世有征夫堪懊惱
幾曾來往怯波瀾

東風開滿一山花茅屋柴門知幾家鼓響樹間朝賽社
煙飄林外早燒畬

正是儂心歎不平忽聞江上棹歌聲夕陽回首郎何處
水遠山長無限情

阿嬌怨

深宮寂寂度年華愁倚雲屏對落花欲把黃金買詞賦

誰能識得馬卿家

漢江

漢江漾漾如苔綠
江上楊花點客衣
流水不隨人事改
遠帆長帶夕陽歸

泊秦淮

落日潮生沒淺沙
秦淮兩岸有人家
當年江總門前柳
輕薄猶飛滿路花

秋夕

蘭燈微焰照金鉗
簾外飛來點點螢
起向玉階間立久
銀河依約渡雙星

宮怨

沈沈宮漏滴長門
坐倚熏籠想舊恩
多謝月華憐寂寞
梧桐窓外照黃昏

寄揚州韓綽判官

廣陵回首路迢迢
堤柳秋聲尚未凋
遙想竹西賓客散
小樓明月自吹簫

懷吳中馮秀才

苔花溪上柳蕭蕭西望閭門客路遙
記得與君停棹處夕陽漁笛小長橋

過楚宮

聞說襄王有故宮山頭斜日映丹楓
陽臺應在雲深處遙聽猿啼碧岫中

憶住一師

山月溪雲憶遠公一鉶一錫住西峯
何由得到安禪處

洗耳間聽碧澗松



石倉歷代詩選卷三百八十四